



Duenh neix, yozyau gawjhengz baez yenzgiusing godiz hozdung ndeu, cujyau muzdiz dwg fazcanj gij suciz raeuz, laebdaeb fungj cangcau cingsaenz caeuq sevei sizcenj naengzlig raeuz. Gou bauqmingz camgya Lij lauxsae cijdauj 《Gofaex Caeuq Yinzdij Gengangh》aen godizcuj neix. Vihliux liujgaij mizgven saenssik, cuj raeuz doengzhag gag yienj gij bonjsaeh cihgeij, mizmbangj youq gwnz vangj caz swhliu, mizmbangj bae duzsuhgvanj yawj saw caz swhliu, hoeng gou byaij ok bakdou, daengz gwnz sevei gauj diucaz, gou cingjeix diucaz neiyungz, veh baenz byaujgwz.

Ngoenz singhgiz gyanghaet, gou gwn haeux gvaq le, couh gip dwk byaij okbae, daeuj daengz gwnz gai giz vunz lai. Muengh gyoengqvunz byaij bae byaij dauq haenx, gou miz di dawz mbouj dingh cawjeiq. Seizneix miz boux mehmbwk ndeu byaij daeuj coh gou. “Bae mbouj bae cam de ne? Lij dwg……” Gou cingq gag gangj gag naeuz seiz, boux mehmbwk haenx gaenq dag henz ndang gou byaij gvaqbae lo. Gou vih gijmaz baenzneix damjsiuj ne? Gou dwg guh vwngenj diucaz, youh mbouj dwg guh gijmaz saeh najmong, caiq gangj lauxsae mbouj dwg ciengzseiz doiq raeuz gangj, aeu siengsaenq cihgeij, aeu doiq cihgeij naeuz “gou guh ndaej” ma? Yienghneix gou enj aek, ngiengx gyauej, ndaw bak nam naeuz: “Gou guh ndaej, gou guh ndaej.” Couh byaij hwnjbae lo. “Boh’ au, gou ndaej cam mwngz aen vwndiz ndeu lwi?” “Ndae ha.” “Mwngz rox gofaex doiq raeuz miz gijmaz ndeicawq lwi?” Boh’ au siengj le naeuz: “Gofaex gojyij sup gij faenz, hawj vanzging bienq seuq bae; lij ndaej caux haujlai yangjgi, giz gofaex lai, hoengheiq couh singjsien.” “Docih mwngz, caiqraen!” Haha, gou cwngzgungh lo! Youh miz boh’ au daep nganxgingq ndeu byaij gvaqdaej lo, yienghceij gig miz vwnzva, gou angq dwk cung hwnjbae naeuz: “Boh’ au, Mwngz rox gofaex doiq raeuz miz gijmaz ndeicawq lwi?” Boh’ au riunyumnyum dwk doiq gou naeuz: “Ndeicawq lai raixcaix lo, gojyij meijva vanzging, sup wyangvadan, caux yangjgi, dangj ndit, dangj faenz, fuengzre gij raemx namh siusaet……” Gou mienh dingq, mienh geiq, ndaw sim gig boiqfug boh’ au miz vwnzva. Seizneix youh miz boux mehmbwk daiq lwngyez gvaqdaej, gou byaij hwnjbae cam: “Mehgux, mwngz rox guek raeuz ngoenzlawz dwg ciet ndaem faex lwi?” Lij caengz caj boux mehmbwk haenx gangj vah, henz ndang daegnuengx haenx couh naeuz: “3 nyied 12 houh.” “Daegnuengx mwngz caen coengmingz! Mehgux, mwngz lij rox seiqgyaiq dizgiuzyiz, vanzgingyiz dwg ngoenz lawz lwi?” “Neix……doiq mbouj hwnj, gou mbouj cingcuj.” Mehgux veiznanz dwk naeuz. Gou cijndaej bae cam bouxwnq, doeklaeng cungj dwg “mboujrox”, neix baenzlawz banh ne? Couh yienghneix gezczu la? Deng, bae bakdou Sanglinz Cunghyoz yawjyawj, Sanglinz Cunghyoz daeggo dahcej gojnaengz rox. Gou lumj mbin nei byaij coh Sanglinz Cunghyoz, laengz boux daeggo ndeu, baez cam, daeggo cungj han ndaej deng: “Seiqgyaiq digiuzyiz dwg 4 nyied 22 hauh, vanzgingyiz dwg 6 nyied 5 hauh, lijmiiz seiqgyaiq gisiengyiz dwg 3 nyied 23 hauh.” Ndei ha, mwngz lij bujcungh aen dem, gou vih gijmaz mbouj cam de nanz di ne. “Daeggo, mwngz lij rox guek raeuz ndoengfaex fuzgailiz dwg geijlai lwi?” De siengj le naeuz: “Gojnaengz dwg 13.9% ba.” Dingz yaep he naeuz: “Deng, couh dwg 13.9% , noix lai lo, raeuz wnggai hengzdoengh hwnjdaej, raemj noix di, ndaem faex lai di, mwngz gangj deng lwi?” Gangj sat gip dwk deuz lo.

Haet neix daeuj, gij yinvu gou vanzcwnz lo, gou hix angq dwk baema ranz. (指导老师:蒙绍山)

Guhcaeg Yawj Densi

偷看电视

贵港市覃塘区蒙公乡高占小学五年级 李起圭

Daj hwnj haj nienzgaep daeuj, lwgda gou couh ginsi lo, daxboh couh hanh gou mbouj ndaej yawj densi, hoeng gou cungj mbouj dingq.

Ngoenz singhgiz ndeu, mbwn gvengq, daxboh daxmeh bae yawj daxdaiq lo, gou cix mbouj bae ne! Aenvih gou ndaw sim miz cawqeiq lo.

“Bwngz”, bakdou gven ndaet lo, gou simangq raixcaix, sim siengj: Daxboh daxmeh cungj okbae lo, gou gojyij caeg yawj densi lo! Ye, gou youz mbouj ndaej yaengx song cik fwngz diuq hwnjdaej, hoeng aenvih gwnz dieg dumz lai, gou diuq hwnjdaej, dauq ndwn gwnz dieg seiz, mbouj siujsim laemx daengjhai gwnz dieg, seiq din yiengq mbwn lo, gou goq mbouj ndaej caekhaex in, luenz hwnjdaej bae hai densi, mizfeih fwdwd dwk yawj dungvaben lo.

Sawqmwh, “dwngdwng” sing din yiengj, lumjbaenz miz vunz ma lo. Gou sikhaek dawz sing densi siu bae, yienzhaeuh dinfwngz mbaeumbi’ mbi byaij daengz henz dou, nyinhcaen baez dingq, caiq dag yangzdaiz yiengq laj muengh, hai, baenzlawz dwg bohme ne, mingzmingz dwg ranznden lungzsaem byaij gvaq ya, gou caen dwg siengj lai lo!

Gou youh maezmwd yawj densi hwnjdaej lo. “Dihdah” nauhcung yiengj lo, gou ngiengx gyauej baez yawj, haiya, 12 diemj cung lo, daxboh daxmeh lijcaengz dauqma, gou dungx iek lo, caiq mbouj miz sim yawj densi lo. Gou ndaep ndei densi, hag yawj bonjsaw hwnjdaej, hoeng, lijcaengz yawj ndaej mbaw saw ndeu, youh dingqnyi yamqdin yiengj lo.

Bakdou “dang” sing ndeu hai lo, cijraen



daxboh naj hoengzfwdfwd, gwnz fwngz gaem mbaw bauq gvjanggau, baez hamj haeuj ma, couh yiengq densi buet bae, gou sim siengj: Daxboh, gou guh ndei cinjbi lo, daeuj ba, lemh gou ndaq gou cungj ndaej. Raen daxboh cuengq fwngz gwnz densi bae, gou laep lwgda siengj: Sat lo, densi lij ndat ne, gou lijdwg vaiq di nyinh loek ba!

Yienghneix, gou byaij daengz dangqnaj daxboh, gazdwdwd dawz aen saeh caeg yawj densi lwnh hawj daxboh nyi, daxboh baez dingq, lumhlumh aen densi, naj bienq ndaej yiemzsuk hwnjdaej, yaepyet, youh riuha hwnjdaej, gou lwngq lo, mbouj rox daxboh ndaw gyongq gai gijmaz.

Daxboh riu gaeuq le cij naeuz: “Lwngawz, gou bonjlaiz siengj doiq mwngz gangj, dou cawx aen densi neix seiz cienh, seizneix hwnjgyaq daengz 1200 maenz ngaenz lo. Gou mbouj rox mwngz caeg yawj densi ne, siengj mbouj daengz mwngz mbouj cam gag gangj lo!” Gangj sat, youh riuha hwnjdaej, caen dwgcaengz, lienz daxmeh hix gaen riu hwnjdaej lo, cijmiz gou boemz youq gwnz sahfaz siengj daej.

(指导老师:覃珍团)

Gou Gyaez Daxmeh

我爱妈妈

德保县隆桑中心校五年级 覃春江



Gou gyaez daxmeh, dwg aenvih daxmeh gyaez gou.

Daj gou rox geiq saeh hwnj, couh roxyiuj gij gyaez daxmeh dwg yienghhaenx unqswnh raeujrub.

Geiq ndaej gou ndaej 7 bi bihaenx, miz baez ndeu, caeuq geij boux baengzyoux ndaw mbanj caegcaeg itheij bae ndaw dah youzraemx, cig daengz mbwn ciemhciemh laep cij dauqma ranz.

Ngamq dauq daengz ranz, laihnaeuz deng daxmeh ndaq lo, hoeng mbouj siengj daengz, daxmeh yawjraen gou le, couh yiengq gou buet gvaqdaej, yungh rengz dawz gou umjgot haeuj ndaw rungj de bae, got dwk youh ndaet

youh rengz. Gvaq haujlai nanz daxmeh caiq soeng hai fwngz, unqswnh doiq gou naeuz: “Bae gwn haeux lo, byaek couh yaek liengz lo.”

Youq henz congz gwn haeux seiz, daxmeh mboujdan mbouj ndaq gou, dauqfanj son gou, naeuz: “Baezlaeng bae gizlawz aeu lwnh hawj daxmeh rox, daxmeh cij mbouj yousim.”

Ngoenzhaenx byonghwnz, gou daengx ndang fatndat lumj feiz coemh ityiengh, baenzlawz hix ninz mbouj ndaek. Youq ndaw moengzloengz, gou dingqnyi daxmeh cam: “Sau iq, mwngz baenzlawz la? Dwg mbouj dwg fatndat?” Ciep dwk daxmeh yungh fwngz lumhlumh najbyak gou. “Aiyo, caen dwg fatndat lo, seizneix youh dwg byonghwnz, baenzlawz guh ne?” Gou cij dingq daengz gizneix, gij vah doeklaeng couh dingq mbouj cingcuj lo.

Mbouj rox seizlawz, aen ndang gou lumj deng vunz umj buet hwnjdaej. Youq ndaw moengzmoengz loengzloengz, gou dingqnyi daxmeh baegfufu, gou menhmenh ndw da, moengzloengz yawjraen daxmeh cingq umj gou ganj loh. Seizhaenx daxmeh daengx ndang buh hanh cumx lo. Gou unqunq doiq daxmeh naeuz: “Daxmeh, cuengq gou roengzdaej ba, gou lij rox gag byaij.” Daxmeh mbouj dingq gij vah gou, de naeuz: “Sau iq, caiq dingj yaep he ba , couh yaek daengz yihyen lo……” Doeklaeng, gou youh muenh gvaqbae lo.

Daengj gou singj gvaqdaej, gaenq dwg ngoenz daihngaih haetromh. Yawjraen daxmeh boemz youq henz ndang gou ninz ndaek lo.

Gou gyaez daxmeh gou, dwg aenvih daxmeh gvansim gou gyaez gou.

(指导老师:黎才新)